

Réamhrá leis an Tuarascáil Bhliantúil Iomaíochta 2021

le Margrethe Vestager, Leas-Uachtarán Feidhmiúcháin agus an Coimisinéir um Iomaíocht

Ar an drochuair, bhí an phaindéim le brath i gcónaí in 2021 – ar ár sláinte agus ar ár ngeilleagar araon. Bhí an chuma ar an scéal go rabhthas ag filleadh ar an normáltacht nuair a bhain eachtra mór eile stangadh as an domhan i mí Feabhra 2022, is é sin ionradh na Rúise ar an Úcráin. Seasann an tAontas Eorpach le muintir na hÚcráine agus lena rialtas, ag forchur smachtbhannaí i gcoinne na Rúise agus ag cur cúnamh ar fáil nuair is gá. Sa mhullach ar an líon daoine a cailleadh agus ar scála ollmhór an scriosta fhisicigh, tá geilleagar na hÚcráine ag crapadh go mór.

Agus an choimhlint ag cur brú ar gheilleagar an Aontais i gcónaí, tá an Coimisiún tar éis gníomhú go tapa chun an tionchar a mhaolú trí Chreat Sealadach Géarchéime um Státchabhair a ghlacadh chun an tacaíocht riachtanach rialtais a thabhairt do ghnólaigh, agus sláine an Mhargaidh Aonair a chaomhnú ag an am céanna. Is sampla é sin – creat a glacadh go díreach aon mhí amháin i ndiaidh don chogadh tosú – den chaoi ar féidir an beartas iomaíochta a úsáid chun freagairt go tapa do riachtanais i ndiaidh suaití seachtracha a bhaineann don gheilleagar.

In 2021, rinne an Coimisiún dul chun cinn suntasach maidir lena athbhreithniú ar phríomhrialacháin, ar threoirlínte agus ar fhógraí chun a chinntiú go mbeidh siad oiriúnach dá bhfeidhm. Go háirithe, tar éis an chomhairliúcháin phoiblí in 2021 maidir leis an dréacht-Rialachán Blocdhíolúine Ingearach agus na Treoirlínte Ingearacha athbhreithnithe, ghlac an Coimisiún an Rialachán nua agus na Treoirlínte nua i mí na Bealtaine 2022. Leis an Rialachán Blocdhíolúine Ingearach díolmhaítear comhaontuithe idir cuideachtaí atá gníomhach ar leibhéal éagsúla den slabhra táirgthe nó den slabhra dáilte, faoi réir coinníollacha. Foráiltear leis na rialacha do thearmann ina bhfuil blocdhíolúine ag comhaontuithe áirithe. Oiriúnaíonn na rialacha nua an tearmann ionas nach bhfuil sé róleathan, ná róchúng.

Maidir le rialú ar Státchabhair, ba bhliain tháirgiúil í 2021 freisin. Ghlac an Coimisiún rialachán lena leathnaítear raon feidhme Rialachán Ginearálta na Blocdhíolúine agus d'fhoilsigh sé Treoirlínte maidir leis an aeráid, cosaint an chomhshaoil agus fuinneamh. Ina theannta sin, ghlac an Coimisiún Teachtaireacht athbhreithnithe maidir le Tionscadail Thábhachtacha ar mhaithe le Leas na hEorpa i gCoitinne (IPCEI) chomh maith le Teachtaireacht athbhreithnithe ina bhfuil treoirlínte maidir le státchabhair lena gcuirtear infheistíochtaí um maoiniú riosca chun cinn.

I gcomhar leis an gComhairle agus le Parlaimint na hEorpa, rinneadh go leor oibre freisin chun go nglacfaí an Gníomh um Margaí Digiteacha. Maidir le hobair reachtach amach anseo, chuir an Coimisiún síos a thogra reachtach i mí na Nollag 2020 agus tháinig na comhreachtóirí ar chomhaontú polaitiúil cheana féin i mí an Mhárta 2022. Is luas an-tapa é sin chun píosa mór reachtaíochta den sórt sin a chaibidlíú agus a chomhaontú.

Éacht eile a bhí ann an bhliain sin ab ea togra a chur síos le haghaidh Rialacháin maidir le fóirdheontais eachtracha a shaobhann an margadh inmheánach. Leis an Rialachán sin, thabharfaí cumhachtaí nua don Choimisiún imscrúdú a dhéanamh ar fhóirdheontais eachtracha do ghnólaigh atá gníomhach san Aontas agus bearta sásaimh a dhéanamh nuair a bheadh gá leo. Uirlis thábhachtach a bheidh sa mhéid sin chun ‘iomaíochas trí chothroime’ a bhaint amach.

Bliain ghnóthach d'fhorfheidhmiú a bhí ann freisin. Agus lánurraim á tabhairt aige do na prótacail sláinte is infheidhme atá i bhfeidhm, rinne an Coimisiún roinnt iniúchtaí ar chairtéil agus in aghaidh trastaí.

I gcás in aghaidh trustaí, ghearr an Coimisiún fineálacha €875.2 milliún ar ghnólaíochtaí a bhí ina mbaill de chairtéal i margadh na teicneolaíochta glantacháin ocsaídí nítrigine do ghluaisteáin díosail. D'eisigh an Coimisiún Ráiteas Agóidí i gcoinne Apple, ina bhfuarthas go sealadach gur bhain an chuideachta mí-úsáid as a cheannasacht chun aipeanna sruthaithe ceoil a dháileadh trína App Store. Lean an Coimisiún dá imscrúduithe i gcoinne Amazon, Facebook agus Google, chomh maith le cógais agus earraí tomhaltais.

Lean gníomhaíochtaí cumaisc ar luas seasta. Ghlac an Coimisiún 396 chinneadh (i gcomparáid le 352 cheann in 2020) agus rinne sé idirghabháil i 14 chás. Rinneadh roinnt idirbheart beartaithe a imreiteach le gealltanais tar éis grinn-imscrúduithe, mar shampla nuair a fuair Danfoss Eaton Hydraulics agus nuair a cheannaigh EssilorLuxottica GrandVision sna margáil le haghaidh táirgí súl (spéaclaí gréine, lionsaí agus frámaí).

Le linn na bliana 2021, d'fhormheas an Coimisiún roinnt beart stáitchabhrach chun tacú le haistriú glas an Aontais. Áirítear orthu sin, mar shampla, 18 mbeart lena dtacaítear le fuinneamh in-athnuaite agus 7 mbeart lena dtacaítear le soghluaisteacht ghlan. Ghlac an Coimisiún cinneadh freisin lena n-údaraítear an dara Tionscadal Tábhachtach ar Mhaithe le Leas Coiteann na hEorpa (IPCEI) maidir le cadhnraí. D'fhan an Creat Sealadach maidir le Bearta Stáitchabhrach a glacadh in 2020 i bhfeidhm in 2021 agus cuireadh in oiriúint é faoi dhó, de réir mar a d'fhorbair na cúinsí eacnamaíocha. In 2021, ghlac an Coimisiún 514 chinneadh faoin gCreat Sealadach. Tháinig an tSaoráid agus Téarnaimh agus Athléimneachta (RRF) i bhfeidhm i mí Feabhra 2021. Maoiníonn sé athchóirithe agus infheistíochtaí sna Ballstáit ó thús COVID-19 i mí Feabhra 2020 go dtí an 31 Nollaig 2026. Tacaíonn RRF le hinfeistíochtaí poiblí agus le hathchóirithe poiblí sna Ballstáit, rud a chabhraíonn leo aghaidh a thabhairt ar an tionchar eacnamaíoch agus sóisialta phaindéim an choróinvíris agus chun an téarnamh eacnamaíoch agus an t-aistriú glas agus an t-aistriú digiteach a éascú. Chun deontais agus iasachtaí a fháil, chuir na Ballstáit Pleananna Téarnaimh agus Athléimneachta (RRPanna) faoi bhráid an Choimisiúin. In 2021, d'éascaigh an rialú ar Stáitchabhair cur chun feidhme na RRPanna chun a chinntiú go bhfuil siad comhoiriúnach leis na rialacha maidir leis an Stáitchabhair. Chun an próiseas sin a éascú, d'fhoilsigh Ard-Stiúrthóireacht na hIomaíochta treoir phraiticiúil do na Ballstáit maidir lena bhfógraí Stáitchabhrach faoin RRF agus lean an treoir sin de chúnamh a thabhairt do na Ballstáit le linn an phróisis.

Bíonn tábhacht le margáil iomaíocha agus Margadh Aonair dea-fheidhmiúil i gcónaí, ach go háirithe tráth géarchéime agus athruithe móra. Má táimid chun téarnamh inbhuanaithe athléimneach a dhéanamh, má táimid chun ár gclár oibre uailmhianach do thodhchaí ghlas dhigiteach a bhaint amach, tá gá le comharthaí praghaís, an fuinneamh iomaíoch agus smaointeoireacht nua a thagann le margáil iomaíocha dea-fheidhmiúla. Chuir an beartas iomaíochta a shaothraigh an tAontas in 2021 go mór leis na cuspóirí sin, agus trí athbhreithniú agus nuashonrú a dhéanamh ar ár leabhar rialacha, táimid ag cinntiú go leanfar leis sin sna blianta amach romhainn. Más féidir linn a bheith cinnte faoi rud amháin, is é sin go dtarlóidh níos mó imeachtaí amach anseo gan choinne agus cuireann sé sin béim ar an tsolúbthacht, ar an oiriúnú agus ar an athchóiriú. Sin é an rud a chuirfidh ar ár gcumas aghaidh a thabhairt ar na dúshláin sin amach anseo.